

E turbo rotonde di mas grandi y mas bunita pa pariba di brug

AVP por siña un les si compara e rotonde 'cuadra' cu a tuma mas di dos aña pa traha dilanti oficina di FTA

STA. CRUZ -- Ayera diadomingo por a mira con diferente ploeg tabata trahando riba e turbo rotonde di Pos Chikito. Aunque cu e rotonde tin su tardanza y no a keda cla na e tempo proponi, mester bisa cu ta haciendo intentonan sobrenatural pa asina haci liher caba cu e caminda aki. Ningun hende ta critica cu e rotonde ta tumando demasiado largo, ya cu tur hende cu ta trafica e caminda aki tur dia por waak pa nan mes con grandi e proyecto aki ta y con tur dia por mira un adelanto. E rotonde simplemente a bira un curiosidad y e ansia pa subi core riba dje ta mas grandi cu e molester cu e ta causa. Esaki door cu tin cu pasa riba e camindanan alternativa na banda. Tur dia e cabeznan ta colga pafor pa mira con e proyecto aki ta desaroyando y esnan den vecindario tambe ta cana atardi ariba e rotonde pa contempla di acerca con mahestuoso e rotonde ta kedando. Caribbean Drip System a traha henter diadomingo riba e matanan cu nan a pone riba e caminda aki, cualnan a keda masha

bunita mes. E drip system a traha henter dia pa duna e matanan un boost-up mas liher posibel. E rotonde ta bay ta asina bunita, cu tur hende tin gana di pasa liher riba dje mas pa disfruta di e beyeza. Mester bisa cu e waya cu a usa riba e brug ta asina fuerte y toch ta duna un bon visibilidad di ambos banda. Ta bon pa pone un camara di vigilancia riba e brug aki, pa si encaso tin algun grappenjas, cu ta kere cu nan por haci nan cosnan sin cu ningun hende ta waak nan. Ayera tabata tin diferente hende ta traha riba e trappinan ariba e trottoir. Otro tabata pinta e caminda mientras otro trahadornan tabata subi pega e waya riba e brug. Gobierno di AVP por siña un les con ta traha rotonde y con ta pone cos move liher, si compara con e rotonde 'rechthoek' na entrada di San Nicolas. Esaki a tuma mas di 2 aña pa construi. Tur e negoshinan riba e strip na San Nicolas a hera bay fayiet e tempo cu AVP a bay purba di traha un rotonde rondo, cu a resulta oval of cuadra.



TIPLINE
585 9500

